



San Simon tal segn di Marchetta

Franco Marchetta al à siera-de la sò esistence su cheste tiere ai 28 di Mai di chest an, a 62 agns. Une vore leât a Codroip, no dome par vè vinçût tre voltis il Sant Simon, al sarà ricuardât propit in ocasion dal premi letterari, cuntune schirie di apontaments che a precedin cheste edizion.

Il calendari des iniziativis, par ricuardâ l'ecletic scritôr, al è stât presentât a Udin a Palaç Belgrât. O vin contatât **Umberto Alberini**, coordinadôr cun **Elvio Scruzzi**, dal comitat che si è dât dongje.

Di dulà nassial chest titul "presince assente"?

"Marchetta al è stât une presince une vore impuartante e ative

su la sene culturâl furlane, fin dai agns Novante, ma cuntune fuarte acelerazion tai ultins tims. La sò assence improvise nus puarte a fâ i conts no dome cul 'belanç' dal so 'fâ culture', ma ancje cu lis domandis plui profundis sul sens de nestre esistence cotidiane".

Cemût vevistu cognossût Franco Marchetta?

"O soi a stâ a Codroip dal 1968 e dai prins Agns '70 o vin fat il stes liceu a Udin, ancje se in classis diferentis (lui al veve trê agns plui di me), e insiemit, simpri a Codroip, o vin ancje zuiât di basket, in diviersis stagjons de vite. No tancj agns indaûr, intune scuadre di 'vecjis gloriis',

Ae figure dal scritôr di Codroip a saran dedicâts ce tancj apontaments, in ocasion dal premi letterari che al veve vinçût par trê voltis. » DI **CHRISTIAN ROMANINI**

lui al è stât il gno alenadôr, un dai miôr che o vedi mai vût".

Isal stât dificil meti dongje i tancj protagoniscj des seradis?

"E je stade une vere gare di solidarrietât par dânus une man concrete tal organizâ une schirie di iniziativis, o crôt, di nivel alt. E ducj a àn limitât al minim pussibil lis spesis o adiriture a àn lavorât cence domandâ nuie. Chest al è il plui biel segnâl de ereditât culturâl lassade di Franco: la voie di jessi par ringraziâlu".

E lis istituzions?

"Intun moment tragicj pai belançs publics e cu lis ferii estivis tal mieç, o vin rivât a vè in pocj setemanis une rispuete reâl e une vore positive, ancje se o sin dome un grup di amis. Arlef, Comun di Codroip e Provincie di Udin, in concret, nus son dongje e nus sburtin a lâ indevant. E tancj altris a colaborin o nus àn dât il patrocini".

Isal alc altri in cantîr par ricuardâ Franco?

"I incuintris di Otubar e Novembar (siet in dut) a son dome l'inizi di un percors che nus impegnarà di sigûr par agns: pal 2015 intant o stin za resonant cul Centri Pasolini e il Comun di Cjasarse sui temis de 'Academiuta' digitâl, e cul Comun di Udin su la dramaturgjie par talian".



ilfriuli@ilfriuli.it

CONCORS GJISO FIOR

Poesiis in gare pe edizion numar dîs

Al è timp fint ai 25 di Otubar par partecipâ al premi di poesie 'Gjiso Fior'. Il concurs, inmanet dal Comun di Verzegnis, al è rivât ae edizion numar dîs, al è libar e riservât a autôrs e scuelis primaris che a scrivin par furlan.

Si pues partecipâ cuntun massim di trê poesii e lis oparis a àn di jessi ineditis. Pes scuelis e je previodude ancje une iniziative colateral 'Piture la poesie': i arlêfs a podarà partecipâ cun oparis, no plui di trê, ispiradis ai componiments dal autôr di Verzegnis.

Lis bustis a varan di jessi

recapitadis ae segretarie dal Concors li dal Comun di Verzegnis dentri di Sabide ai 25 di Otubar.

Par cualsisedi informazion si pues contatâ la segretarie (0433 487460 o 0433 487987) o viodi su internet:

- www.comune.verzegnis.ud.it
- www.concatolmezzina.it
- www.filologicafriulana.it
- www.friulinelmondo.com

SCOLTADIS DI DRIUS

Masse golôs

A l'è talmentri golôs che, prime di dopralis, al bagne les supostis cu le cjocolate.



Euronews informa

Provincie, trente mil euros a pro des Universitâts de tierce etât

Lu à decidût la Zonte su propueste de assessore Musto

Trente mil euros a pro des Universitâts de tierce etât. Lu à decidût la Zonte provinciâl tant de ultime riunion su propueste de assessore ae Culture Francesca Musto.

"A saran doprâts - e precise Musto - par cuvierzi lis spesis relativis al funzionament e al davuelziment des ativitâts culturâls propuestis di chescj Ents. Che a son nassûts par ufrî une oportunitât di aprendiment pes personis anzianis, ma che dopo a àn slargjât la lôr atenzion ancje a altris fassis di etât, par fâ in mût che lis personis a puedin in mût continui iniorârsi di cognossincis e esperiencis par vivi miôr, par une miôr cualitât de vite".

l cors de Ute, che a van de educazion a la

salût ae identitât furlane, des lenghis forestis ai laboratoris creatîfs artistics e artesanâi, a son cetant seguîts e frecuentâts e a costituisin, oltri che un moment di incuintri jenfri gjenerazions diviersis, une ocasion di cognossince, di socializazion e di cressite interpersonâl. Stant ae assessore Musto, la Provincie no vûl dome jessi un ent che al distribuîs i bêçs, ma ben al à chê di premiâ e sostignî la filosofie di fonde des Universitâts de tierce etât. Come la promozion dal volontariât: un aspjet impuartant e un esempli di pratiche solidaristiche che e merte di jessi metude in vore ancje in altris contescj. Te tablei i contribûts concedûts a lis Universitâts de tierce etât de provincie di Udin.

DENOMIAZION	CONTRIBÛT CONCEDÛT 2014
Universitât de Tierce Etât de Cjargne - Tumieç	€ 5.144,00
Universitât de Libare Etât - San Pieri dai Sclavons	€ 657,00
Universitât des "Liberetâ" dal F.V.J. - Udin	€ 7.409,00
UTE "P. Naliato" - Udin	€ 6.523,00
Universitât pe Tierce Etât "Citât di Çarvignan e Basse" - Çarvignan	€ 1.693,00
Universitât de Tierce Etât dal Codroipês - Codroip	€ 5.040,00
UTES Universitât di dutis lis Etâts dal Sedeanês - Sedean	€ 513,00
Universitât de Tierce Etât di Lignan - Lignan	€ 503,00
Universitât Cence Etât "Citât dal Tratât" - Cjampfuarmit	€ 730,00
ACSEL Associazion Culturâl e Sociâl des Etâts Liberis - Tresesin	€ 1.215,00
Universitât de Etât Libere - Morteian	€ 573,00
TOTÂL	€ 30.000,00